

## **Anna Maria Caduff-Hendry, Gonda**



Sisum Gonda, agl ur dil Drun ha Anna Maria aviert ses eglis per l'emprema gada ils 27 da schaner 1916. Ses geniturs ein stai il calger Luis Hendry a Maria Lucia naschida Soliva. Ensemens cun treis mez-fargliuns ord l'emprema letg e cun quater fargliuns ord la secunda, ha la Meia, aschi eis ella pil pli vegnida numnada, passentau sia ventireivla affonza. Cun nov onns piarda ella la cara mumma Lucia. Tierparents, vischins e vischinias ein segidai, denton la mumma han els buca saviu remplazzar. Igl onn 1937 marida la Meia il giuven Gion Caduff da Rueras. A la Meia ha quei pass purtau clarezia e cauld ed in ver dacasa e sustegn. La letg crescha e cun plascher astgan els selegrar da tschun affons, ina buoba e quater buobs. Quels portan bia legria, mo era bein enqual quitau e fastedi.

Igl onn 1958 vegn il fegl vegl, il Leci Antoni, tuccaus dil cametg sil Cuom Val. Geniturs e fargliuns piardan aschia ina carezau fegl e frar ella flurenta vegliadetgna da vegn onns. 1971 piarda la Meia siu consort Gion ella vegliadetgna da mo 58 onns. Capeivel che talas fridas laian anavos ses fastitgs. Quellas portan grevezia e malsegirtad e la sanadad pitescha. Ils affons bandunan il da casa, e quei ei mintgamai in tagl ella veta dalla Meia. Denton portan las biadias e beadis danovamein sulegl e clarezia en casa sil Crest.

Igl onn 1980 sedecida la Meia da serender a Sedrun/Gonda en casa da vegls s.Vigeli. Leu sesenta ella bein e quei levgiescha.

La nauscha grippa digl unviern vargau ha era visitau la Meia e muort sia sanadad mudergiada prestau il siu. Siu vaidi ella perpetnadad ha entschiet ils 9 da fevrer. In numerus pievel ha accumpignau l'Anna Maria sin siu davos viadi en baselgia e sin santeri. Ad ella la pasch celestiala.